

摘藻堂四庫全書薈要

集部

欽定四庫全書薈要卷一萬五千一百七

集部

青山集卷十六

宋 郭祥正 撰

雜題古詩

白玉笙

白玉笙咸通十三年琢成琢成匠人十指禿進奉明堂
聲妙曲當時應賜恩澤家流傳至煜煜好奢高堂日日
聽吹笙不知國內非和平仁兵萬衆一旦至國破蒼黃

笙墮地雖然訛缺未苦多却落人間為寶器管長纖纖
剥筍束况值吳姬指如玉不見排星換掩時自然天韻
來相續昔時禍亂曲今日太平歌興亡不繫白玉笙但
看君王政若何

金熨斗

金熨斗酌醇酒熨開萬斛之愁腸贈爾千年之眉壽酣
酣笑臉坐生春安用逢人嗟白首

翠碧盃

翠碧盃滿酌正是桃花開一年三百六十日幾人待得
春歸來春歸來不飲酒翠碧之盃爾何有

魏王臺

金城東百尺高臺臨遠空長江浩蕩劍門險欲平吳蜀
難為功誰傾黃金建佛廟擊鼓撞鐘夜還曉香厨供辦
老僧閑玉欄花謝游人少我來獨立想英雄戰艦連雲
氣槩中猶有斯臺尋舊址可憐銅爵起悲風

藏舟浦

金城北荒荒野水連雲白島嶼相望一徑通遠堤楊柳
迷春色天下三分血戰秋張遼鑿浦暗藏舟吳蜀雖亡
晉已起山川自結寒煙愁永平只作尋春處關門鎖斷
春歸路畫船載酒歌白紵不忍醒時送春去

悲陽春

悲陽春陽春可樂胡為悲桃花枝上開未足數片已逐
狂風吹陽春能來不能久年少看花今白首擊毬馳馬
力已疲欲傍樽壘先怕酒佳人如皓月顧我猶衰蓬相

倚不相似兩心何可同請折並蒂花更看鴛鴦鳥容華
與毛羽相鮮乃為好揮手謝佳人浩歌悲陽春陽春易
衰歇爾貌豈長新

江上游

我乘逸興浮扁舟楊花渡江飛滿頭河豚初熟鱗魚爛
借問春光須少留人間乍聽黃金鳥物外誰憐白雪鷗
但願滄波化為酒青山兩岸皆糟丘人生快意天地小
登覽何必須瀛洲漁歌聲斷自起舞酩酊更看江月流

望夫石

杜鵑啼血春林碧，妾有離愁異今昔。上盡高山第一峰，
目亂魂飛化為石化為石。可奈何，淚懸白露衣。薜羅千
古萬古望夫恨，一江秋水寒蟾多。漢家天子點征役，良
人荷戈歸不得。此身未老將何從，不如山頭化為石。

兩山間

江南南山連北山，蒼藤翠水水潺潺。水深藤老木拱矣，
不知游子何時還。白雲孤飛歲華晚，獨鶴一聲星斗殘。

兩山秀色手可攬嗟我不得山中閑

蓮根有長絲

蓮根有長絲不供貧女機柳梢有飛綿不暖寒者衣朝
歌悠悠暮歌短下地沉沉上天遠東生白日還西流志
士長懷萬古愁

朝出青閨裏

朝出青閨裏自汲井華水井水如磨銅妾面似芙蓉照
影還自歎淨洗松華濃郎騎白馬玉闕去令人繡被冷

春風春風欲盡來何遲
蚕蛾散子鷓鴣兒寫得短書無
寄處幽恨填膺淚如雨

墨染絲

縹絲自喜如霜白
輸入官家吏嫌黑
手持退印競傳呼
倏見長條染深墨
墨絲歸織家人衣
別買輸官吏嗔遲
寄言北敵與三軍
汝得豐衣民苦辛

苦雨行

陰風黑塞雲漫漫
虛空晝夜騰波瀾
羣龍淫怒煩神官

銀河源源來未乾日月暗行天豈安地下萬物泥濼攢
角鷹快鵠摧羽翰小魚為鳳蛙為鸞君子有憂心盤盤
欲上問天造化端蒼天無路不可干哀歌空屋聲何酸

曉晴歌

霜風刮刮侵人膚宿雲卷卷歸江湖天開碧幕萬里鋪
飛出東來三足鳥羽毛渾丹光焰敷地下萬物凍以舒
我今踴躍行樵蕪白粳可糴酒可沽烏為母吾為雛致
我之暖令我之舖嗟不能報烏區區

麟州歎

邊兵不覺西人至麟州倉卒城門閉城中帶甲僅防城
城外生靈任凋斃元戎底事不防秋千里郊原戰血流
漫說知兵范僕射未免君王西顧憂

雲月歌

白雲微散月華生月下白雲和月明白雲猶解背人去
明月只知隨我行我行不停月未落心期白雲出寥廓
披雲揖月邀嫦娥願携素手濯銀河

月下聽吟雲月歌
歌聲寥亮舞婆婆
婆勸君一酌千萬壽
今宵雲月情偏多
不知雲月誰為主
愁看月落雲飛去
願如明月有圓時
不學白雲無定處

勸酒二首呈袁世弼

湛湛酒杯綠酣酣
爐炭紅佳人放玉板
拂鏡照芙蓉四
海無波瀾吾曹方宴閑
大笑凌白日高吟動南山
百歲能幾何會少別離多
少年嗟賈誼壯士憶廉頗
不如醉魂魄冠巾任傾側
冥然逍遙鄉香與塵寰隔

陰雲蔽白日長風卷驚濤江上崢嶸百怪嗥挽君船纜
勸君住且飲百棧之醇醪吳姬笑臉如櫻桃鯉魚紅絲
落霜刀醉來不識天為高共君攀天跨鯨鼈下視萬物
皆勞勞

牡丹吟

三月金張啓仙館百種名花此尤罕昭君曉怯胡地寒
太真晝卧華清暖夢為莊叟蝴蝶狂散作襄王雲雨短
莫笑空山芝與蘭冷豔不隨金剪斷

左真觀

逸士騎魚入滄海石壇遺跡今猶在桂煙散景夜寥寥
玉露凝華春璀璨重來舊隱經幾年挈笠携鋤姓名改
主人不識何當留墨灑梁塵爛星彩

事見本
觀刻石

雜言寄耿天隲

耿夫子聞懸車齒清髮紺殊未老璨璨滿腹懷明珠恥
隨黃雀啄官粟矯翼直與冥鴻俱東城之下言還舊廬
田有秣稻池有嘉魚林有美木園有青蔬笑傲樽俎俯

仰琴書與其折腰以羣辱孰若潔身而自娛予將蹴滔天之高浪跨橫海之長鯨攬午夜之明月邀逸駕于赤城酌王母之瓊液獻商皓之玉觥於是揮手景駐長嘯風生投冠纓于下土化鱗鬣于北溟也

琅琊行

琅琊異他山坡陀晦諸峰惟有山下水其源與天通尋源見樓閣鴛瓦青重重寶鏡遞華燈空巖散踈鐘薰成香積界回首非塵籠陽水俗篆未足數禹偁八詠元無

功我來獨酌惜已晚醉倒不見歐陽公摩挲蒼崖讀舊
記誰掣玉索纏蛟龍不憂石泐解磨滅斯文自與元氣
同徘徊落日跨馬去老松為我搖悲風

交難

馬蕭蕭車軋軋道上行人半相識識面雖多心友難滄
海可量人莫測君不見張陳昔日刎頸交臨陣彎弓返
相射又不見坐中耳語程將軍背罵一錢猶不直噫吁
噫休休休猿鳥可為伴麋鹿可與游春日晴暉暉春風

思悠悠春泉滑涓涓春林碧柔柔行止任所適歌嘯忘
吾憂逢人輒掩口語發多為讎

楊白花

二首

池水滿宮柳長胡地沙晴日色黃自知憔悴容華改朝
來臨鏡懶梳粧却尋攜手舊游處拾得落花空斷腸
秋風起黃葉飛宮門深鎖日還西背人一去音書斷塞
雁無情亦解歸此恨此愁無處託暗塵消盡縷金衣

靈芝宮

曾子固傳
王平父事

靈芝宮乃在滄海之上白雲之中樓閣縹緲金間碧玉
花露濕香隨風寒光長瑩別有月笙簫間作春冲融來
時不託夢中路覺後唯聞長樂鐘神仙誰云與世隔暫
游復返精誠通倏然物化豈真往舉杯髣髴聲傳空蓬
萊異館信非妄羅池廟食今猶豐仕途機穽了可畏天
地雖廣身不容低摧至死寄僧榻曠達一念起樊籠揮
毫不似人間世想見光焰如長虹

圓山謠

廟食圓山忘歲年自言耽酒未能還身披羽衣手提藥
時時混迹來人間七言四句又奇絕固非俗事能追攀
蓬萊却在漳水上鰲頭突起滄波環長蘿秀木鏤春色
石泉自瀉秋聲潺伊予來漳四十日始造秘殿瞻威顏
歸鞍未解疾遽作寒氣束縛形骸跼夜夢青衣捧玉盤
琉璃十影傳靈丹欣然投齒咀三四若飲沆瀣生脩翰
精神頓覺枕上醒五鼓未送蟾光殘明朝視事若平昔
僚吏爭賀詢其端真仙垂祐必終始凡骨豈易當珍丸

便思勇決謝塵網
往跨皓鶴叅翔鸞
吟詩賣藥同至樂
安用包羞拘一官

芳草渡

落日渡頭芳草碧
傷如之何送行客
客行無盡草相隨
塞北江南同一色
秋霜野燒年年事
綠芽迸地先春力
芳草多情不變常
行人自去無消息

我歸矣

我歸矣江之南
一蓑一釣桃花潭
桃花潭水深千尺


李白

句金鱗尾尾密如蠶得魚輒笑放魚去我不貪餌爾何
貪移船就月還一飲天為方牀月為枕水紅芙蓉爛雲
錦醉則縱橫看花寢看花寢如之何向來憂患付煙波

青山集卷十六

謹案卷十三第十一頁前八行刀裁尺量非扇迷
興來欲跨橫空伎二句疑誤





總校官進士臣胡榮

校對官編修臣裴謙

謄錄監生臣金士虔

謄錄監生臣范相

欽定四庫全書薈要

集部

青山集卷十七至
二十

詳校官助教_臣常循



欽定四庫全書薈要卷一萬五千一百八

集部

青山集卷十七

宋 郭祥正 撰

五言律詩

四皓

彼美四賢老高風萬古寒去逃秦鼎鑊歸識漢衣冠翼
翼羽翰就堂堂宗社安商山敝廬在還入白雲端

晚望

久客心嘗折登樓望轉迷風傾蘋葉亂雨重柳條低未
得趁金馬何當似木鷄細尋鄉國路愁聽暝鴉啼

即事

北戶風欺幌南橋水拍城柳長無嫩色鶯老有新聲書
帙看慵卷茶甌不厭擎故園何日返此地獨含情

幽居

春晚堪行樂幽居獨閉門忘形付詩酒吾道委乾坤壤
壁蝸涎亂殘經鼠跡翻交遊今已絕孤坐欲何言

江亭

江亭孤坐久野望眼偏明
映日浮雲薄搖風細柳輕
出墻新笋熟拍岸晚潮生
遣僕沽春酒幽歡取次成

遣意

髮為煙嵐禿愁因患難添
徑荒無過客筍迸任穿簷
啖雀誰能遣驚鳥不用占
有巾堪漉酒聊欲效陶潛

春水

春水碧泱泱平堤映綠楊
田疇資灌溉鷗鳥共徜徉
放

餌愁空掣浮杯興最長
晚風吹細浪仍送落英香

早起

客愁偏早起衰病愜晴明
索酒防春瘴披衣聽鳥聲
舊書慵檢閱新客懶逢迎
何日籠樊啓再歸溪上耕

初夜

初月未成魄瘴天雲霧低
浦昏舩競入林密鳥爭栖
徧性憐幽獨香醪自挈携
布衾今夜冷猶得避兒啼

可惜

可惜花飛盡春歸客未歸艱難行路險老大賞心稀翰
墨誰曾問漁樵與願違江干空駐目藜杖得相依

客禁

客禁何時釋驚魂夢裏歸深處愛隣虎穴那得並魚磯草
色欣欣茂螢光箇箇微殘生苦多難搔首掩荆扉

卧柳

冉冉碧濠邊三株細柳眠根欹元着水葉大鎮藏煙不
作棟梁用豈憂斤斧先春風任飄泊客意亦留連

水漲

山雨連朝注溪流沒草亭蛟鼉方汹汹鴻鵠自冥冥只
恐翻河漢終當見日星波瀾平地作嗟歎未曾經

水花

水畔花饒笑敬枝映小亭日光烘欲醉江色冷還醒淺
白渾迷鷺殘紅尚襯萍幽人頗蕭索此地要頻經

西齋二首

西齋吾所構簷角頗依林蕭洒松篁影暄和燕雀音青

春那肯住白髮任相侵稍悟淵明樂時時撫素琴
西齋吾所愛一徑綠蘿深終日聽新鳥令人忘故林地
偏無客到山潤有苔侵禍患須安命優游不廢吟

南樓

兀坐南樓夜欄干俯列星村遙喧瓦鼓塔近震金鈴濕
草理昏瘴飛蟲接小螢物生皆有理吾亦委頽齡

自貽

自恨心肝拙題詩愈不工癡迷循磨蟻辛苦打窗蟲妙

道知何補多言自取窮不如長寂默塊爾白頭翁

溪岸

溪岸逢春暮柔條儘意攀輕鷗翔近渚好鳥響空山
小艇長欹側孤雲自往還遠遊成底事白首憶鄉關

要客

要客來何晚重乾漉酒巾玉琴虛別操藤榻恐流塵
山暗蕭蕭雨花辭短短春杖藜慵緩步愁殺獨遊人

城南

淡沲城南路參差柳絆煙稻秧纔一寸蠶子始三眠曲
折藏花地暄和載酒天清江深有興只欲解歸船

夜興

日沒草堂陰收書復掛琴閉門人跡絕危坐客愁深星
漢光鏗動湖山氣象沉常娥如借月蚊蚋莫相侵

夕陽

夕陽沉谷口海水接天南歸鳥自成陣暝山如半酣看
雲貪仰面移杖忽遺簪幽獨誰相過人情老始諳

遷居

殊方留滯客，遷館避誼譁。
破榻依寒竹，疎窗對晚花。
燕歸疑識面，鳥噪默懷家。
囊橐無書卷，新愁有五車。

交游

一作閩南客，幽憂忽過春。
交游半鄉相，蹤跡自埃塵。
未附垂天翼，空成涸轍鱗。
吾廬松菊在，悵望孰溪濱。

微寒

廣潦生寒夜，幽人獨倚樓。
渚涯迷海若，燈火想漁舟。
雷

鼓蛙爭響雲天月暗流未應時序變初夏返如秋

旅食

旋煮青芹滑新炊白稻香僧居同淡泊旅食幸康強未
擬沉湘水深防死耒陽上書終自達聖世本虞唐

客問

來時麥未吐今見秀盈畦投竄還遭石登雲孰有梯爾
讒徒似錦吾醉只如泥行止無勞問空山杜宇啼

廢閣

疊甃基猶在排空閣已摧燕愁尋舊棟蟻壺傍新苔月
色閑圓缺風聲自去來廢興何可問劫火亦成灰

松風

夜寂松風度魂清客枕寒琴聲傳不盡詩句寫應難驟
雨傾瑤砌真珠落玉盤隱居如可訪吾欲跨翔鸞

揮扇

六月長汀郭晴多暑氣濃欲眠難藉草選蔭必依松綠
水遙思濯青雲底處逢西巖殘照盡揮扇待踈鐘

寓館

一徑松陰合重門
院落深客來聽鵲喜
春過惜鶯吟
風月時經檻
塵埃不到襟
黃庭看在手
白雪任盈簪

松檻

婆娑松與檻
夾徑碧濛濛
未辨雪霜操
同沾雨露功
低枝翻翠蓋
重葉密樊籠
它日為樑柱
掄才合至公

立夏

歲旦辭江國
炎天客瘴鄉
浴陂羣鳥白
含霧野梅黃
恨

別山隨眼消愁酒滿觴殘魂終易斷回首只茫茫

深夜

四天垂翠碧一水湛星辰寂寞殊方夜漂流片葉深帝鄉勞夢想客路只風塵鐘鼓還催曉深慙釣渭濱

競渡

競渡傳風俗旁觀亦壯哉棹爭飛鳥疾標奪彩龍回江影渾翻錦歌聲遠震雷輕生一餉樂時序密相催

傷春二首

臘月花開盡中春不見花柳陰空拂地草色漫平沙客
路心常折僧窗鬢自華故鄉何處是瘴海暗天涯

春雨時時暗春花眼未經生涯隨過鳥世態委浮萍瘴
霧何由避蠻歌一忍聽誰家有醇酎吾欲醉兼醒

西池

雨漲西池水微瀾拍畫橋不愁蓮芡沒唯恐棟梁漂扶
杖防危步移牀避晚潮何當風日爽一舞看纖腰

積潦

積潦連江海春撞說劍鋒郡城千丈折民食五年凶雨
脚懸麻直雲頭潑墨濃忘機唯白鳥不解避蛟龍

自笑

自笑姑溪客還投瘴海邊不才無進路多病復殘年欲
種千竿竹將求二頃田人生底事足且愛酒涓涓

喜晴

瘴鄉仍久雨生事念樵漁江海雲歸盡乾坤日上初短
垣張澣服幽圃理殘蔬佐國知無術聊欣病體舒

城上

危步欲何適城頭獨杖藜
水歸滄海後雲散暮天時
秋色長空淡笳聲迥野悲
泥沙埋熟稻一穗亦無遺

獨醒

野性惟怜酒無聊遂獨醒
風塵雙白鬢天地一青萍
鵬鳥寧須賦離騷未是經
回頭付陳迹終欲醉冥冥

邸報

立法新三省論才只數公
簿書期會正風俗見聞同
北

敵瘡痍後朝廷氣槩中不才思獻賦天路恐難通

宦情

宦情寥落甚況在九溪邊瘴霧易成雨颼風偏覆船水
殘餘盜賊村迥少人煙欲達中州信迢迢路六千

自遣

骨相殊屯賤無官只有階半生萍梗過兩鬢雪霜排去
國腸空斷求田心未諧新交莫相笑中立一枝柴

西庵

一庵丹荔下更與畫橋隣不許塵埃到每期風月親好
音聞度鳥斜影辨踈筠拂拭白藤榻欹眠穩病身

雨過

雨過添幽事褰裳步暖沙竹梢含淨霧藤刺冒輕槎
瀾瀾雙隨浪蜻蜓對覓花老夫詩思愜頗覺日沉車

野寺

野寺盤山腹高秋雨霽天拂簷雲漫漫穿竹水涓涓接
食憐馴鳥措筇暮老禪經年無客到門巷疊青錢

青山集卷十七

欽定四庫全書薈要卷一萬五千一百九

集部

青山集卷十八

宋 郭祥正 撰

五言律詩

晚晴

川漲那堪雨今朝喜晚晴幽花紫霧重濁水止蛙鳴圩
稻應全刈村醪可強傾吾雖無一畝亦足慰餘生

屏迹

屏迹已恨晚疲軀今自由百年無七十一日有千憂覓
酒開青眼憑詩遣白頭莫言賓客少池上兩三鷗

却卧

曉起梳頭畢開窗却卧時素煙收枕席紅日上藩籬仰
面看書卷移床近酒池紛紛萬方事安用老夫知

無客

病久人情厭經旬客不來簾因風力卷門待月華開柳
上新蟬咽城頭暮角哀勞生隨物化孰免葬蒿萊

門巷

蕭蕭秋容淨蕭蕭門巷深荆榛元自合車馬少過尋
問婢催蔬熟呼兒取酒斟藤床未成寐野鳥噪歸林

賦分

賦分從來薄明時敢妄干六年悲對獄五十速休官
水送雲天淨山開洞壑寒一枝能息影何假北溟寬

農事

三歲悲農事官倉亦已貧勅書雖赦獄恩澤未蘇民南

國供輸大中宵涕泗頻一心隨草木無復念沉淪

野望

暑雨收殘候秋雲結薄陰山光翠兼紫水影淨還深竹
密羣鴉入天空一雁沉興來搔白首哀颯愧儒林

日暮

倚杖孤亭久無心辨俗訛暮山青掃靛秋漢白浮波岸
震歸船鼓村喧刈稻歌未收西望眼問罪有干戈

歸燕

天外秋風勁梁間燕羽稀營巢雛未老何地汝成歸
蜃澤多樓閣茅堂無弄機故園春色動還趁社前飛

遣懷

節物驚心事搏金菊放花潛魚防餌釣高雁避城笳
南浦秋風冷西江夕照斜異鄉消息斷林外更聞鴉

搗衣

清秋送殘暑隔壁忽聞砧遠震星河夜遙興闕塞心欲
知針縷密即是淚痕深它日功成後逢人寄好音

植杖

獨往憐魚艇羣飛愛暮鷗誰云天地窄自伴水雲游荇
葉青爭老蓼花紅半收江頭人事絕植杖我何憂

空囊

床有牛衣卧厨供石髓飡此身知是幻卒歲不為難水
合潛蛟冷雲深病鶴寒青錢無得選空掛一囊看

秋笛

清秋聞笛弄獨立露沾衣天外雲留住水中龍未歸悠

揚聲益苦感激思何微不似前春聽梅花片片飛

黃山二首

秋物已瀟洒臨高念歲窮陣收羣雁沒峯斷片雲空月
色山川內笛聲關塞中西人未柔服長策在諸公

秋晚陟浮丘西臨古渡頭兵聲沉斷岸橋影散中流雪
讓蘆花密雲排稻穗稠乾坤均帝力草木豈能酬

柴門

水落煙村迥柴門四五家晚風回斷雁寒雨側幽花世

事紛無已人生自有涯
鯨鰲真可釣吾興欲乘槎

復寒

三月閩南國陰寒變慘淒
市樓添酒價山雨聽鶯啼
田父憂春種商人怯路泥
何當好風日稚子浴清溪

元輿携酒見過三首

永日門常掩欣聞五馬過
社餘巢燕入花散蜜蜂多
望斷千山綠愁來兩鬢皤
肝腸思一濯須借酒為河

酒味年來美携觴約屢過
交情貧始見詩思老仍多
許

國心嘗赤思家髮任皤
誦君新得句秀色攬山河
沉毅陳夫子談兵孰與過
運籌知必勝善將不論多
漢陣千重黑胡沙萬里皚
如聞洗戈甲誰為挽天河

雨中喜君儀要溫老希聖同見過二首

蕭蕭山寺雨漠漠暮雲寒
不恨麻衣薄深愁酒盞乾
離披花刺眼容易雪衝冠
要客能相過寧辭濕錦鞍
萬里鄉園別一春風雨多
亂蛙聲鬪急歸燕舞緣何
石榻昏苔蘚柴門暗薜蘿
極株方自笑忽枉故人過

謝君儀携酒要客慰唁愁寂二首

佳客過窮巷良朋復可要
靜緣碁局亂愁逐酒杯
銷花底鶯聲度林間雨點飄
晚春頻一醉何必擬松喬
讒人未投北君子獨相親
歲月驚春晚壺觴慰我貧
松聲風外急山色雨中新
一醉無歸夢寧論寂寞濱

白蓮啓日上人退避長老之命以四韻高之

結宇古城邊能詩復悟禪
鉢分摩詰飯池種遠公蓮
竹颺春煙靜禽歌夜月圓
潔身吾有趣回首謝塵緣

送李絳伯華戶曹

國士苟微祿攜家千里行鄉關寒食節郵舍冷猿聲落
日和雲盡離觴與淚傾銜冤仍送別何以慰浮生

和石聲叔留題君儀基石亭二首

高才攄遠趣鑿石架危亭宿鳥依林白春苗接海青雲
光隨簾亂泉響置琴聽况得少陵句宜鐫座右屏
因山基大石華榜揭高亭畦稻翻新綠山嵐浮遠青鳥
行雲際度松籟雨餘聽安得吳生畫為子傳小屏

謝君儀寄新茶二首

建溪春物早正月有新茶得自叅軍掾分來居士家碾
開鑿玉餅湯濺白雲花一啜清魂魄醇醪豈足誇

北苑藏和氣生成絕品茶豈宜分旅館只合在仙家點
處成雲蕊看時變雪花琳琅得新句又勝玉川誇

曉起聞禽寄元輿

幽鳥語清晨牕間宅禁人只知添白髮不覺度青春救
過頽三省觀空只一塵賢交如未棄時送濁醪醇

寒食感懷示子燾二首

柳暗青春暮鶯啼靜院陰鄉闕隔寒食父子共沾襟未
舉鵬天翼聊為鵬舍吟驚魂招不得時節感人深

寒食金波淚它鄉此日心草連天際色泉斷隴頭音先
塚三年別飛埃萬里侵只憑欹枕夢時到謝山陰

寒食元輿見要南樓把酒

五馬登城堞千分載酒舩無家寒食客小雨惜花天循
撫恩何厚飄零命最遭閑愁不用遣一醉暫成仙

夜雨感懷二首

夜雨靈難霽溝塍復亂蛙輕寒浸病骨餘響答空階杜
子嗟沾濕莊生失渚涯通宵不成寐歸思瀉長淮

羽毛零落易摧傷父子同幽瘴癘鄉歸夢不成殘夜雨
空階滴滴到愁腸

憶小子鼎

元朝別家去音信隔三春讀易應終卷端居莫患貧定
交疎燕雀養節慕松筠冤獄何時辨思兒淚滿巾

排悶呈元輿

交態非今薄人情自古難
敝裘甘我老雄劍請君彈
魂逐雲峯斷心依酒海寬
百年能幾許日月似跳丸

懷天隲

築室君先隱窮途我正難
流鶯春谷暖別鶴玉琴寒
泉響經時聽雲光抵暮看
異方空淚眼何日共幽歡

元輿三月三十日致酒

衰病仍為客相依過一春
和篇驚韻險把酒沃愁頻
紫

燕巢方穩黃鸝語尚新何時公赴召終欲託車輪

元輿試北苑新茗

建溪雖接壤春末始嘗茶旋汲鄰僧水同烹北苑芽月
圓龍隱鬣雲散乳成花貢入明光殿分來玉謝家

別南樓

寄榻六十日朝朝上碧城雲光隨近遠山色變陰晴濠
靜魚頻躍樓空燕不驚它時那復到欲去重含情

四月一日

有瘴從今始斯須雨復晴草蒸蛇肆毒榛密鵬嘗鳴晚
食宜防飽村醪可強傾何時擊歸鐙高眎歎浮生
俗傳晚食不可令飽飽即中瘴須數飲以禦之

別濠上

自得莊生樂觀魚近碧濠觸萍時鼓鬣防餌不投刀柳
挹春風靜鷗眠夜月高捨旃吾有適滄海釣鯨鰲

聞舊居教樂

昔作幽人宅今為舞女場燕驚弦管雜草避綺羅香誼

靜雖殊致興衰自有常遙憐崑桂下誰拂讀書林

登清音亭二首

已別城樓景還登樹杪亭地高隣北斗山遠接南溟蟾
影依雲斷樵歌隔浦聽客愁安用遣此處可忘形

薄暮杳何適高高登古亭地無南國瘴簾卷半空星石
瘦長人立潭春皓雪停短才吟不就終欲付丹青

雨中懷元輿

暫阻龍山雨還思鳳閣人凌雲曾獻賦薄霧豈藏身酒

釀公田秫羹調紫豉尊稍晴應見過酬和莫辭頻

雨晴都按口號呈元興

雨為華筵止晴牽飲興長管弦隨晝永羅綺散風香
杖留春碧宮衣想赭黃明年今日事歸捧祝堯觴

青山集卷十八

欽定四庫全書薈要卷一萬五千一百十

集部

青山集卷十九

宋 郭祥正 撰

五言律詩

元與憐我復有漳南之行以麴局不可出遂置
一樽託公域弟酌發眷眷之情於此可見矣以
四韻謝元與并呈公域弟

憐我萬里別南荒多瘴埃身為官事隔酒託故人開飲

德知難報論歡默可猜宗家有毛女冰潔勝寒梅

公域
美姬

姓毛毛女
古仙人也

與元輿論詩而風雨驟至

一作城頭飲重論別後詩倏然雲雨至應有鬼神悲敘
事公偏富求聲我最知賡酬三百首餘韻付咸池

元輿近詩加妙用寄四韻

誰識子昂孫新詩靄暮雲體兼諸謝備名與少陵分今
去知無敵從來自出羣南山能射虎只許李將軍

謝元與送鮮鯉煮酒

鮮鯉江湖味香醪日月春
撫循時有贈飽暖遂忘貧
玉縷空投筴金波漫入脣
交情令乃見晚節共松筠

招攷祐二長老嘗茶二首

無物滋禪味來烹北苑茶
碾成雲母粉香濺碧松花
消渴梅何俗安神術謾誇
清談嘗數碗莫笑老盧家

昔人多嗜酒令我酷憐茶
軟玉裁成餅輕雲散作花
石泉助甘滑腸胃滌煩邪
却怪少陵客曾無新句誇

追和故友袁世弼酬孜老四韻

坐諷湯休句閩南朱夏時碧雲生海嶠清吹散松枝救
物寧論報安禪不履危江東飽芹蕨肯赴野人期

寄題建陽王祖聖朝奉南澗樓

郎省辭榮早樓居鶴髮翁響分南澗水清占北窗風紫
府雲常近黃塵路不通何當陪杖屨有意學冥鴻

壺公山方卿墓亭

勤國棠陰在壺山墓草黃慶源長不竭善訓永無忘燕

雀春風裏煙雲碧瓦傍
命書何日下潛德發幽光
至節日君儀見過誦思猿佳作

不赴郡樓宴能過野寺門
撫循悲節物飄泊任乾坤
瘴霧經霜盡溪潮向晚渾
思猿有佳作敢為倒清樽

雨懷安止三首

春雨靈難霽春山阻俊游
綠迷芳草恨紅濕落花愁
古劍空彈缺踈簾懶上鈎
何當生羽翼一日似三秋

身隔空山雨心同物外游
成篇超俗格開卷釋新愁
鸞

鳳翔青瑣蛟鬣掛玉鈎重吟垂翼句春氣返如秋
雨隔陳夫子僧坊懶度游閉門誰復過欲語已含愁病
翼深防彈驚鷗鱗遠避鈎交情君勿替松柏挺霜秋

聞惠休師將浮海如吳省寶覺禪師

去興已翩翩輕包赴海舩霧收山翠濕月出浪華鮮鼓
動看風力浮沉信佛緣何時達鍾阜重省寶公禪

雨霽懷進醇老

宿雨洗林扃開窗曉色新池深魚競躍花落鳥頻驚結

友論三益營居共一城風騷真有意世事久無情

覽進醇老詩卷

羈栖海上州歲晚得師游句瀉碧潭月篇成清夜秋雲
根龍洞鑠花氣蜜房收此理何人達營營枉白頭

同蕭英伯登淨惠寺山亭二首

策杖輕衣愜凭欄遠目明清江排暮釣綠草碎春耕嗜
酒今非勇題詩尚有情薄游攀俊德唐相舊家聲

一徑穿林麓幽人借杖扶西山螺頂秀南塔筆鋒孤好

鳥當花語輕烟襯草鋪登臨情未足暝色欲吞吳

又和英伯四首

亭出林巒表春歸氣象明江晴稚子浴田暖老夫耕弱
柳禁風力游絲奈客情欲歸歸未得愁聽杜鵑聲

野興憐詩逸春醒要酒扶登臨同俊哲笑傲不羈孤日
落金霞卷江翻雪浪鋪閩山又寒食何日到東吳

亭臨天外構春物望中明客興託詩酒野心恰釣耕露
花如有恨風柳自含情何事子規鳥故為腸斷聲

開亭當險絕疑有百神扶江靜羣鷗集天空一鷲孤落
英紅錦碎狂絮白氈鋪試問江南信歸帆至自吳

送惠休師浮海如吳

游吳興不淺真欲跨冥鴻豈為海波險自明禪性空
樓瞻北斗帆索張東風我欲江南去音書却易通

雨中酌君儀所送酒有懷

冬雷知不密地震復如何海角晴明少客心憂慮多
白鷗欺浪舞黃鳥挾春歌幸有故人酒門深掩薜蘿

午日送酒與元輿

前歲菖蒲酒臨汀共一樽
迴思當觸網猶有未招魂
抱義君偏厚餘生我尚存
都城酬此酌佳節可重論

樂游軒呈運使陳大夫

狹徑通蕭寺墻開薜荔陰
坐聞松籟奏歸待月華沉
雅有賢人樂清無俗空侵
一軒寧久駐四海望為霖

西池水漫蓮葉資深勸予理之

短短芰荷葉深深野水漫
何神能止雨無術理驚湍
久

客懷三徑包羞拘一官賞心那復數歲望骨毛寒

稍霽二首

稍止今朝雨猶理瘴嶺雲亂流安可塞故老未嘗聞陰
怪羣難數陽光晚漸分僅能存井邑不復念耒耜
靈霖靈晝夜積潦接郊郭小艇家家有危椽處處扶
稍晴人共喜却暖鳥爭呼海若一何變幾翻天地樞

自和二首

已喜收微雨還愁合暮雲潮痕殊未減屋拆厭頻聞天

地溟濛內山川早晚分吾民方乏食何以慰耕耘
猛風來半夜駭浪却平郭避地憂橋斷登山借杖扶馬
牛真不辨老稚亂相呼安得瞻晴景蒼苔繡戶樞

淨惠橋亭為水所漂因勸寬老葺之二首

怛悵風兼雨西橋半夜摧青龍真變化白鳥漫驚猜蕩
滴無遺跡登臨不再來道師如好事重為購良材
水漲西橋折重來路已差簷牙翻駭浪石脚沒平沙夢
想追塵迹湮沉歎物華何人能起廢壯觀老禪家

送陳輯都曹致仕還鄉

賦筆驚場屋，高才難陸沉。宦游今日盡，野興暮年深。
黃菊看看秀，青雲處處陰。君懷能亢爽，吾意亦侵尋。

舟經彭澤謁靖節祠

彭澤江邊邑，蕭疎靖節祠。煙昏鹿皮畫，草暗菊花籬。
詠德今千載，言歸彼一時。男兒要出處，此道幾人知。

竹子灘逢廣漕張公詡二首

泗水初傾蓋，西江再逆舟。策能課賊滅，心不為身謀。
夜

永談無寐樽空幸少留遲明還惜別飛漿下灘頭

會合嗟無酒留連漫索茶晚雲隨落日歸雁集寒沙自

達聊安命多言任指瑕吾宗有令弟恩復出君家

吾弟
蒙正

為公美
所薦

螺川送別王公濟朝奉還臺

亭上客送客江頭山映山白醪須酌盡彩鳳欲飛還帆
轉踈林外煙生遠渚間離愁自堆積輒莫唱陽關

送郭晦叔知海州

凜凜汾陽秀螺川舊徙居文名動場屋孝節冠鄉閭御
史論才久方州躡等除朝廷終器使宗廟得璠璣

英州煙雨樓

江路分韶廣城樓壓郡東妓歌星漢上客醉水雲中
潑墨天涵暝鋪綃月映空登臨逢此景不復念途窮

南山禪院

棟宇新成寺黃金貼翠微山眉一雙碧江帶兩條飛
亂石森門戟晴雲作舞衣薰絃誰與奏松響瀉珠璣

廖華國使君致酒

飛蓋穿林外行厨就竹間
酒狂思海瀉歌響遏雲還
逸驥方騰躍疲駑強附攀
磨崖記名姓長伴水潺潺

同穎叔修撰游吳圃分得須字

地與浮丘接花如錦帳鋪
杜康傾琥珀海若獻珊瑚
老竹爭抽笋幽禽自引雛
人生行樂爾富貴亦何須

即席和穎叔送別四韻

三月溟濛雨春寒返似秋
玉觥浮濁浪蘭楫擬滄洲
自

顧駕駘困寧攀逸驥游楚歌彈未徹歸思已難留

蔡梧州敘拜禮用四韻謝之兼送別

卓犖金閨客經過慰老夫能當韓子拜深愧孟生愚開
卷詩千首論交酒一壺春風送和氣連夜入蒼梧

寄東莞李宰宣德

舊交幾人在寧嫌雙鬢皤一生長作客九死漫悲歌歲
月驚秋速關山恨別多君須陟臺省吾欲隱松蘿

送象守賈正夫朝奉還臺二首

六載為南郡歸時雪滿顛一家纔度嶺單騎欲朝天介
潔終無玷精神老尚全十分愁別酒魂斷鵠亭前

十載音書絕扁舟忽見過有樽傾別酒無妓唱離歌海
濶春光少城空瘴霧多羨君先度嶺猿叫隔雲蘿

追和李白金陵月下懷古

唐格

歷覽古都會金陵冠南州天開鍾阜倚江轉玉繩流異
代有興廢前賢歸塚丘草沒烏衣巷塵埋結綺樓城空
龍虎踞臺罷鳳凰游默想秦淮月曾悲玉樹秋

和穎叔千歲棗

彼美祇園棗珍同玉井船後期千載熟今日萬珠圓地
潤仍依佛欄深自暮煙結花雖最晚藏核莫如堅鴨脚
看何小鷄頭美未全種來誰共老服久必成仙大食移
根遠番禺託蒂連舊名稽藥錄新賞著詩編甜出諸餠
上香居百菓前黑腰虛羨爾紅皺豈為然柔脆憐金鳳
飄零難木綿諷苞丹荔賦精奪寶刀篇靜夜風回海清
秋月蘸天綵山要客集翠顆繞枝駢邂逅為公壽婆娑

與世延暮鐘催酒散嘶馬引旗旋今作中州瑞元從異
國傳何當廣栽植欲以慰饑年

廣福禪寺

寺與人寰隔西軒更遠瞻雲烟生卷箔星斗半垂簷山
對眉雙碧江空鏡一奩旅魂招不盡愁向酒中添

馬仁山

在繁昌縣南舊名馬人唐德宗時石馬妖鳴斷其首
以厭之易今名

崔嵬山下石如馬亦如人
玉老龍蛇護菴空歲月新
訪僧非舊識覽壁但傷神
更恨無流水難尋洞裏春

青山集卷十九

欽定四庫全書蒼薈要卷一萬五千一百十一

集部

青山集卷二十

宋 郭祥正 撰

五言律詩

同穎叔修撰登蕃塔

寶塔疑神運擎天此柱雄勢分吳越半影射斗牛中拔
地無層限登霄有路通三城依作鎮一海自橫空禮佛
諸番異焚香與漢同祝堯齊北極望舶請南風瑞氣凝

仙露靈光散玉虹
鐸音爭響亮春色正冲融
眎筆添清逸凭欄說困蒙
更當高萬丈吾欲跨冥鴻

將至歷陽先寄王純父賢守

竹馬交游早星軺會遇難
行年均坎坷撫已共悲酸
鳳去鐘山暝龍吟洛水寒
朝廷新日月風俗舊衣冠
佳郡分符印脩途振羽翰
樽醪千蟻汎樓瓦萬鱗蟠
直節堅逾栢忠心赤奪丹
才華僉論著功業鼎銘刊
賤子初投甯收身即棄官
生涯添鬢雪歲序走江湍
造膝思陳榻

論詩愧杜壇鷓鴣信微物聊假一枝寬

鄭致國宣義見過小山留飲敘舊

敬夫內
相令子

一見翰林子悵然懷昨遊盡為泉下鬼猶有水中漚

皇祐

京城之游
惟子獨在

屏迹今雖久驚魂恐未收殘年惟伏枕幾月

不登樓促榻開青眼論詩慰白頭嶺雲遮薄暑江雨濕
新秋蔬飯漸無味星軺強少留會難真可惜老去只添
愁明歲聞官滿高才副帝求功名隨會遇閱閱暢源流
養大應知損安卑且尚柔不孤將有託吾說肯虛投

得瑞金暉評上人書因以慰之

野寺三秋別緘書一度投青開今日眼白盡昔年頭高

義嗟難得勞生苦遠游新亭名六以真妄復何求

上人書云

林間新作小亭名為六以

寄題六以亭

以幻聊觀幻亭將六以名隔林風籟息滿地月華清不
動超千劫隨緣度一生有時拈柳標劃斷野泉聲

立夏日示陳安國宣義

昨日春歸盡輕衣畏暑侵落花空眷影新葉自成陰晝
永惟便睡蟬清稍伴吟小團宮樣茗分酌莫辭深
携酒就陳安國隱居小酌

家住逍遙國門無車馬音十分消睡茗一寸已灰心春
去花應盡潮生岸恐沉徑須携飲具來傍荔支陰

同崔員外訪陳安國隱居

共出塵埃外來尋董監家未能穿草屨且欲駕柴車谷
斷雙橋險門荒一徑斜客心聊為洗石鼎煮新茶

書尋真觀王契元先生祠堂

久悟尋真訣應為蛻骨仙壽齡過九十功行滿三千舊

話皆如約

八年前先生見予約以九十二歲前尚可一見

知心信有緣相思一

盃酒和淚洒雲泉

寄九江陶子駿通直

家住廬山脚堂開佚老名清朝知止足白髮慰平生日
月歸千載乾坤付一觥曾逢金馬客喚作小淵明

寄題程信叔朝散先墳思成堂歸真亭二首

水聚山仍合營祠構一堂丹青瞻邃表簪笏遍諸郎煙
雨和春暝松篁浥野一作絕澗香命書連歲下潛德發幽光
世澤從今遠音容杳莫期桃源春去後華表鶴歸時月
慘煙雲晦風生竹樹悲登亭還洒涕千載景豐碑

題趙康州石聲編後

一賊鳴銅鼓孤城隕使星形骸糜矢石忠義貫丹青皎

皎張巡傳

聖俞表

新新李子銘

荆公誌

吾詩愧涓滴何以助

南溟

宿廣善院

峻嶺隔人世深雲藏寶坊
龍鱗蟠碧瓦虹影卧雕梁
道濟三途苦齋餘七日香
炎天蚊蚋絕此地信清涼

謝賈明叔侍御見過敝廬

不是少陵客寧煩謝子過
雨昏窮巷柳風折小池荷
至

論鏗瓊玉幽情愛薜蘿

公屢愛陋
居幽僻

朝廷容直道予亦樂

漁蓑

和胡與幾承議藏雲山雲際寺留題

山路入雲際山深雲更深老龍方晦角秀木不依林溪溜氷生面泉泓月作心何須常抱石天下望成霖

上巳席上有贈

眸子剪秋水丹青畫不真誰知上巳日忽見浣紗人姑射長留月桃源別有春地衣新樣錦羅襪不生塵

賈侍御同游石盆寺以白玉船酌酒

共訪青山寺仍翻白玉船不憂身墜馬先覺口流涎水鏡初涵月雲峯半倚天新堂雖未就詩思已飄然

寄漳州陳昌國解元

為問陳昌國醇醪幾度春海中消息斷

予飲器名酒海
舊詩云感君添

我海中春

枕上夢魂頻舊恨隨流水新吟待故人何當騎鹿

去重笑九溪濱

送褚南翁赴潯幕

學行從來著官臨益有規衆人皆信謗惟我獨無疑萬
里還趨幕三年且待時煙霄岐路在晚達未為遲

送劉彥思推官

入幕三年久還家萬里遙道孤誰汲引政善衆歌謠北

夢君方穩南魂我未招官醪不許買別恨幾時消

邸禁
官務

不得買

細酒

謝倪敦復惠酒

江雨今朝霽柴門爽氣高病餘逢七夕書至得雙醪飲
德知無盡論心敢憚勞鳳團分賜茗持以報詩豪

喜胡展誠改官南歸

聞道扁舟至南歸得意人拜官臨百里增祿慰雙親所

養應趨大能廉不患貧山家一樽酒聊為拂京塵

何明道宣德話所見龍作四韻志之

跬步雙龍起驚嗟莫遁藏冰鱗搖白影火鬣縱紅光穴
地遺涎在排雲曳尾長不逢吳子畫想詠獨難忘

送南劍王倅奉議

何幸一身老親逢三世賢文章吾已盡閱爾能傳歸
劍光生夜層樓影插天課書登善最漢殿席應前

和劉漢陽見寄郎官湖佳作

出郭湖光滿轉山湖影涼得名因太白起廢自劉郎石
鏡三更見荷花一丈長客來籌往事蘭草死猶香

和劉漢陽浩然亭

磴道通絕頂登臨懷敞廬山雲數峯斷江樹一行踈舊
史名空在新亭畫不如自迷姑孰釣深愧漢陽書

雨中懷倪敦復因以密雲團寄之二首

曲巷無人至幽居覺日長數聲猜舊燕一縷惜殘香着
雨花枝困欹風柳帶忙夢魂招不得惟是到君傍

三載久相依看看歎別離
不堪江雨隔空對野梅悲息
迹無人問因禪與物違
密雲新樣茗封送習家池

和朱行中龍圖游澄惠寺

一水碧漪漪更逢煙雨微
草昏千步障松掛六銖衣
冷翠光爭滴殘紅濕不飛
自怜詩句拙空伴使君歸

夏寒

三伏當炎熱翻如九月天
晨興重衣袂夜雨盡防川
舩撼江聲怒樓侵雨氣纏
白頭悲世態何以度殘年

元輿待制藏舟浦宴集

聖世銷兵久樓船不復藏清瀾浮桂楫紅袖薦瑤觴
荇菜風牽碧荷花雨迸香孔融真愛士寧厭禰生狂

合肥逢清璉上人

即圓通慎
禪師弟子

閩國衣冠後匡廬法性師江河傾辨說冰雪淨容儀
塔影龍蛇護松聲猿鶴悲門人忽相過話舊涕空垂

癸酉除夜呈鄰舍劉秀才

六十明朝是今年此夜除勞生一樽酒陳事數行書
臘

逐燈缸盡春回律管初不愁家信斷安穩藉鄰居

夜泛麻湖

片片冰消後盈盈月落初舟輕風勢急水濶雁鳴踈生
事長飄泊愁懷自卷舒還憑過江夢一為省吾廬

保寧寺靜軒

隱几傳真樂此軒深復深衆喧從過耳一法不關心雨
止溪添漲風行竹亂陰誰云非對動吾欲寫瑤琴

風

颯颯來何處空崑虎一聲蕩搖神女態飄忽楚王情有
力疇能禦無根長自生掃除天際霧為放日車明

冬夜泊金山

寒野雲陰重新冬客意忙道途無處盡歲月有時長流
落隨江海崩騰避雪霜還投白蓮社清淨萬緣忘

寄致政徐丞二首

為問徐夫子歸歟樂幾何宦情今日盡野興與雲多供
佛延親壽開樽許客過終期卜鄰去松下按

一作

長哦

老二十
為問徐夫子身閑心若閑一樽陶令酒十頃謝家山雲
外冥鴻去松顛獨鶴還令人起高興從此卜追攀

送叔父入川

霰雪滿江海破帆風易吹從今孤鳥興不及共巢時讒
謗寧須辨神明豈易欺峽山雲木老莫動故園悲

送人赴巫山尉

薄宦杳何所令人重別離暮天歸鳥盡濕櫓渡江遲神
女十分色襄王萬古悲到官無盜賊覽古數題詩

送許秀才二首

許子來何謂還家興未忘青山聊自愛白路不知長皓
雪飄詩句寒星動劍鋌嗟予倦塵俗無術接翱翔

西風吹落葉片片旅人心半夜有歸興明朝雪滿簷濁
醪聊惜別精藝少知音草店青山外解鞍孤月沉

送衡武陵赴闕

夫君老文學國士盡知音往奏相如賦休怜阮藉吟一
樽江上酒千里日邊心人問武陵事桃花春水深

采石觀

江水流還

一作環

合山形到此孤
突然樓閣聳疑有鬼神

扶門外橋蹤在沙邊
王氣無我來何所得
石上採菖蒲

康王觀

路絕蒼崖險橋橫大壑
飛花殘啼鳥去雲重
老龍歸劍
珮塵埃化冠纓
繪塑非客來空悵
望魂斷夕陽西

三妓顧予幽獨戲作四韻

忤俗遭羅網何緣即掛冠
閉門誰復過獨酌豈成懽
客

久添衰疾春餘尚苦寒幽花雖入眼不似故園看

贈臨江守范希遠龍圖


傾蓋相逢晚開樽上小樓感時心尚壯欲語涕難收
神主方思治英才悉應求邦畿分使節玉陛通宸旒
溫密親聞詔精忠屢獻謀養兵能足食行縣必寬囚
舜日期無盡堯雲遽莫留鼎湖龍化影銀海雁沉秋
事畢身先貶名高衆所尤一麾甘去國千里漫承流
兄弟皆朱紱雙親未白頭遭讒雖坎坷安命亦優游
雪意饒冬暖灘

聲奈客愁須君作霖雨終附濟川舟

青山集卷二十

謹案卷十八第九頁前二行晚食宜防飽原本防

訛傍今改



總校官進士臣胡榮

校對官編修臣裴謙

謄錄監生臣范桐

欽定四庫全書叢要

集部

青山集卷二十一
四至

詳校官助教臣常循



欽定四庫全書薈要卷一萬五千一百十二

集部

青山集卷二十一

宋 郭祥正 撰

七言律詩

淮南韓魏公新祠

新祠重見舊風標
儀鳳無聲立紫霄
富貴榮華垂四紀
功名事迹冠三朝
月移簾影燈常在
春散庭陰木未喬
何獨斯名懷惠愛
帝詞天篆刻琨瑶

韶州唐張文獻公祠堂

文獻頎頎學問該可憐為相遇嫌猜當年致主陳金鏡
後世空祠見鐵胎武水直疑龍卧久韶山時想鶴歸來
我朝繼有襄公出誰道南方乏美材

謝發運穎叔寵寄新什

春風冉冉送流年一望雲霄一慘然帝閣輟才聞出使
漁蓑終老不成仙已甘荆棘填靈府想見蛟龍走蜀牋
正是水深波浪濶忽逢高雁寄華篇

陳秀才惠示長歌答以四韻

世路飄零久愈羞詩壇誰許結英游身留海上三年夢
心寄江南一葉秋已分羽毛藏枳棘儘從讒謗起戈矛
真才合比驪珠貴何事傾懷輒暗投

和君儀感時書事

海角逢春子細看一番鶯燕展輕翰約風柳帶金爭軟
着雨梨花玉鬪寒隴笛不知何處咽秦箏着意為誰彈
留郎更賦多情曲直欲豪華將杜壇

阮希聖新軒即席兼呈同會君儀溫老三首

阮軒要客暮雲時
淡蕩晴絲日正遲
出屋花光紅瑪瑙
隔湖山色碧琉璃
老榕垂榦侵踈箔
新鴨呼雛過短籬
我欲高吟還閣筆
坐中留蔡搃能詩

海邊邂逅禁煙時
選勝携壺不可遲
日對山光如琥珀
水涵天影似琉璃
蝶隨柳絮翻羅幕
人並桃花映竹籬
却憶綠槐陰下路
曾尋宮葉為題詩

誰憐齟齬老明時
把酒尋春已恨遲
舟漾綠波飛舴舨

煙籠青瓦碧琉璃狂嗟李白驅鯨海醉笑陶潛倚菊籬
爭似隔林聞一曲與君重賦杜秋詩

聞陳伯育結綵舟行樂游湖戲寄三首

湖波渺渺浸殘春東郭開筵迴不羣聞結綵舟撐碧落
更携簫鼓度青雲自憐玉海終無敵却憶瓊漿竟未分

伯育先寄詩有與君分兩石之語

珠履難陪空悵望且憑詩句張吾軍

東陳風義舊傳聞鷓鴣鸞鳳果逸羣青竹題詩才倚馬
畫船槌鼓氣凌雲賞心自向明時得樂事應容下客分

敵飲會須翻玉海背河決勝看齊軍

臨漳多士冠南閩况復高才更出羣筆下文章翻錦繡
坐中談笑領風雲美名合預青錢選邪黨今從白眼分
聞欲高亭張雅宴寂寥應憫舊將軍

次韻君儀風物可愛之什

二月風光着意看莫思旅食久艱難林間鶯喜緡蠻語
水畔花愁料峭寒游子牽衣遮道飲美人携瑟上樓彈
少陵野老誰能繼君有新詩合築壇

淨惠山亭要客致酒

何處要賓入醉鄉
宰雲亭榭冠南漳
城隨山阜龍蛇轉
花覆園林錦繡香
三月風光聊酌酊
百年人世少康強
採薇甘餓簞瓢樂
安用須為畫省郎

感懷寄泉守陳君舉大夫

柴門永日淚沾巾
事與心違漸失真
家住江南幾萬里
身留海上已三春
明時枉作銜冤客
皓首翻為哭子人
多謝泉州賢府主
數將書札問悲辛

再和阮軒即事

游人隨處踏青時，日永天低樂奏遲。
水上往還多翠碧，盤中光潔盡琉璃。
重山複嶺爭侵戶，淺杏深桃半出籬。
正是鮮春堪愛惜，勸君莫作送春詩。

和君儀高明軒

一軒華榜揭高明，簷角昭昭掛日星。
鷗鷺翩翻下空渚，雲烟時復起中庭。
長蘿却覆鮫綃帳，遠岫爭開翡翠屏。
香篆半消塵念息，始知天地一浮萍。

携茶訪徐彥醇助教

蓬華蕭然一畝宮
生涯四壁有清風
鄉閭高行終無玷
場屋遺才誤至公
書卷五車心盡記
年華八十耳猶聰
滿林雪液聊分酌
別後音塵豈易通

送饒守李澤民承議

傾蓋論心古亦難
詞源向我瀉潺潺
番川共惜顏公去
漢室誰憎賈傅還
莫遣塵埃侵鬢髮
且張圖畫對雲山

公自畫番
川二圖

何時樽酒重相遇
魏北江東落照間

南樓有懷元興

且欲臨高遣百憂故携筇杖立城頭
田家隔水犬吠犬天氣新晴鳩喚鳩
靡迤物華春又盡紛霏塵事老何求
使君閑暇須游樂莫為愁人罷樂游

元興以予宅禁而未嘗把酒豈可以

僕而廢他客乎

次韻元興言懷

與君交臂每忘憂用即三公尚黑頭
美化流行非乳虎新詩老重似睢鳩
篋中璣貝方論價江上田園未足求

信道斲輪真妙手，只慙縲紲玷英游。

臨江春晚

黯淡陰晴閣雨天，清明將近見鞦韆。
風高喬木鶯初轉，水暖平沙鷺鬪眠。
身計只知憂陷穽，年華豈解老神仙。
迢迢歸路三千里，始信家書直萬錢。

次韻元與臨汀書事二首

福撫開山罷戍兵，我朝仁澤始流行。
嵐煙蒸濕同梅嶺，地脉逶迤接贛城。
花木藏春先臘折，兒童要壽半巖名。

如今太守真黃霸里巷歌謠善治聲

巖名謂南安巖王

碧瓦參差幾萬間重樓複閣更回環
城池影浸水邊水鼓角聲傳山外山
鑿落鬪傾元弛禁鞦韆爭蹴未容閑
使君得意同民樂日擁笙歌倒醉顏

近郭溪山最可游雨晴天氣返如秋
人携羽扇防濃霧馬惜羈泥涉淺流
竹葉要翻金盞底梨花偏稱玉釵頭
卧龍勝事堪圖畫迴壓閩南七八州

雨中南樓望西方僧舍要元輿同賦

殘春絲雨洗氛埃一日重城望數回翠色淺深添草樹
輕綃高下覆樓臺溪聲遠與鐘聲雜山影分從電影開
不得畫工如立本使君吟寫最多才

東郊

東郊悵望惜春歸頗覺年來萬事非不奈離愁須覓酒
待聞歌響却沾衣蜜蜂捕藥穿花去巢燕尋泥拍水飛
物態風光能幾許老無憂患世人稀

雨霽

今朝晴日照柴扉
即看輕雲捲翠微
燕子有情歸舊棟
柳條牽恨拂征衣
故鄉書信何時到
瘴地煙嵐此處稀
白酒一盃聊強飲
物情人事恐相違

白蓮院觀蔡君謨要師遺迹

盤屈龍蛇未奮身
老禪當日亦知人
來趨蓮幙文章客
去作金鑿侍從臣
物外論交終不泯
壁間題字尚如新
年年楊柳春先綠
誰復多情與望春

開元客館

裂瓦欹椽五六間，地形高下頗依山。
黃鸝相應雨初過，綠樹成陰春已還。
土竈有煙營飯飽，柴門無客任苔斑。
却思一釣滄浪去，蘋葉蓼花相伴閑。

開元禪寺

三寺參差見刹竿

東塔天王開元三寺相鄰

開元形勝據龍蟠，樓臺

影落青霄險鐘磬聲傳碧澗寒，物物有緣香供盛，塵塵無礙法筵寬。
欲隨大士披華藏，北斗容身不亦難。

次韻元輿雨中見懷二首

屋漏沁窗玉篆斜索居蒸濕度年華衝冠欲訴中都獄
抱義難酬漂母家地隔五湖秋雁絕草荒三徑曉猿嗟
幸君數送瓊瑤句枯枿蒙春亦吐花

雨鏢柴門一徑斜詩筒時復現英華自憐白髮非商叟
却對青山憶謝家卞玉逢知終薦達隋珠投暗只驚嗟
悲歌半夜彈雄劍恨血千年變土花

小閣夜眺

白日塵寰憂思深夜登危閣解煩襟空山雲盡月涵壁

絕壑風生松奏琴，佳客不來分坐賞。
濁醪誰為此時斟，踈鐘輒莫催清曉。
吾欲凭欄更一吟。

南山晚步簡自宣長老

雨過南山紫翠深，團團仙露洒衣襟。
碧雲影裏寒猿嘯，玉澗聲中怨鶴吟。
期赴前林同茗酌，倦投盤石揀蘿陰。
憑誰寄語謝康樂，安用披榛故遠尋。

次韻元輿題王祖聖南澗樓清斯亭二首

平昔朱衣駕兩轡，高樓歸隱卧雲泉。
文章未許矜盤谷。

水墨無勞畫輞川春日半晴花照地秋風入夜雁連天
燒丹辟穀非吾事能遠塵寰即是仙

松徑泂溪溪水深水光澄碧倒松陰浮盃可酌劉伶酒
坐石仍彈靖節琴無數輕鷗隨出處幾番佳客伴登臨
自嗟羅網何時脫往濯塵纓為一吟

贈武平許令

昔拜先翁滙水濱存亡回首幾經春鳳毛今喜為花縣
鶴髮誰嗟困客塵篋有贈篇長取讀心藏遺德尚如新

源源世澤來無盡
桂籍傳家已四人

遷居西湖普賢院寄自省上人

十畝方塘四岸榕
夕陽初盡月生東
不嫌瘴地無家別
猶喜山房有路通
寧使五塵長我縛
得超三界與師同
遷居却作安居計
病入殘年兩耳聾

夢游金山作四韻既覺止記一聯因足成之

夢

作第
二聯

珠簾高卷倚危欄
望盡方知出世間
江海交流雲縹緲

樓臺相映月回環薰成香界渾吾地化作天宮別有山
京口瓜洲竟安在夢醒却欲泛舟還

次韻無逸長老秋居見寄

榕樹蕭蕭一逕深門庭秋靜紫苔侵能依幻質循元覺
默運真悲拔衆沉有想願分香界飯忘言求出世間心
旃檀漫把爐中爇無盡無邊結寶陰

追和紫霄翁記夢二首

乘雲親到紫皇家不是人間舊物華四座散香春結蓋

一墀栽玉曉生花入盤仙李皆含露出鼎馱金尚帶砂
偶對吟牋追昔事猶疑鸞鳳數行斜

笑上蓬萊第一山葱蒼半落有無間金雲壁月夜何永
玉殿珠樓人闕閑五嶽已能超險路九天從此造玄關
回頭為問桃源客底事鷄鳴便欲還

次韻元輿見寄二首

不得陪公九日行想提椽筆瞰西城風流自可追王粲
憔悴猶能憶禰生萬里還家唯有夢一身投獄豈忘情

何時共擲滄溟釣醉倚三山欲鱸鯨

霜雪蕭然滿鬢鬚平生憂患更無如強傾濁酒消塵事
每見荒榛憶舊居倦鳥久摧千里翼故人頻枉數行書
城頭高閣何時到多在三春細雨餘

酬蔡溫老秀才見寄

一庵聊寄碧巖陰忽得新詩慰我心俊逸自追天馬健
崩騰還與海濤深門前俗子無行跡物外松風有好音
病起可能携杖屨共尋明月到溪潯

酬宗福長老見寄

寄榻西湖不掩關，殘年猶得伴僧閑。
身投羅網歸無路，目送煙雲幸有山。
新句忽傳文字外，舊游重想笑談間。
故人風義如師少，慰我憂愁兩鬢斑。

再用前韻寄省上人

四壁蕭然我亦空，更無歸夢到江東。
樓臺不碍塵塵現，鐘鼓相聞法法通。
玉麈揮談真契合，蓮華分座夙緣同。
回頭重濁堪憐憫，妙性如何自瞽聾。

和安止懷予北歸悵然有作三首

濛濛春氣撲晴霄游水登山望沈寥舊學已荒三歲懶
故鄉何處一身遙沉溝斷水思班匠吹沫纖鱗待晚潮
君有高才當自奮不應先我問耕樵

雨餘風物一番新得句慚非畫手親柳眼含煙如恨客
花心凝露欲啼春黃鸝出谷方求友紫燕營巢不避人
獨我未沾青帝力僧窗聊寄幻泡身

一讀詩翁寄我篇却思鄉國醉瑤泉數聲玉樹秦淮月

萬里春江采石船
軒冕浮沉真外物
冤親平等委前緣
杜陵子美知何意
更欲吹噓送上天

青山集卷二十一